



ALTI STAINLEMER ALTI GARDE

Mir sin e Volgg, wo's doch bis hit
scho duusigi vo Joore git
mir hän-ys sälte kenne weere
und miesse mänggem Land aagheere
vo Bayern, Schwoobe, iiber Braisse
und wie sy alli zämme haisse
schlussändig isch-es doch in **d'Hoose**
hit gheere mir zue de Franzoose

Dr Näppeli, dä nuggisch Bolle
spiilt au doo e groossi Rolle
schliesslig het däa, ooni z'frooge
d'Gränze um das Land ney zooge
är het glyy gmerggt, dä glaini Wicht
ass alles fir die Geegend spricht
mit dääne Lyt kasch fascht wie niene
schnäll e haide Gäld verdiene

En-anderschtmool isch unschyniert
dr schnauzig Delfi yymaschiert
im Stächschritt, mit dr ganze Horde
....und mir sin widder Schwoobe worde
au die Lyt hänn schnäll uusegfunde
wie flyssig mir halt sin do unde
me het-ys ussgnoo, bloggt und gschupft
und wie-ne Suppegigel grupft

Mir wärde ständig ummegschoobe
zwische Franggryych und de Schwoobe
me kaa's bis hit fascht nimme zelle
wie mänggmool uns e Land het welle
numme gfroggt het uns e kaine
was mir zue all däm libel maine
do kunnt uns numme ains in Sinn
mir welle bliewe, was mer sin

Die Lyt, wo uns zer Zyt regiere
besser gsait, wo das brobiere
mit dääne isch au nit vyl looss
die hogge aifach aanigslooss
z'Paris und koschte numme Gäld
und maine, no, sy sygge **d'Wält**
derby, ganz aifach gsait und kurz
sin die nit mee wärt, wie-ne Furz

Fasnacht 2017

Mir welle bliewe, was mir sin

Es isch verdannewald scho schlimm
jetzt will-me s'Wertli «Elsass» nimm
es soll jetzt haisse «Franggryych Oscht»
das stooost aim uff, wie suure Moscht
am beschte wär's fir Grooss und Glai
mir blyybe fir uns ganz elai
wie die im Sydde, dert z'Monaco
alles andere isch doch Gaggo

Dr Namme Elsass – gopferdagg
dä biirgt doch fir e guete Gschmagg
mir hän e langi Dradizzioon
fir Guets uss unsrer Region
Spaarse, dinni odder digger
Suurgrutt und dr Edelzwigger
nit z'vergässe isch dr Minschter
ooni uns wär s'Lääbe finschter

Mir finde's drum hit nimme glatt
und hän das alles langsam satt
me het sich geege uns syt Joore
immer wiider wie verschwoore
jetzt mache mir no ai Versuech
und schigge Basel doo das Gsuech
denn - wurde mir zue Basel gheere
wurd das vo uns kuum aine steere

Schliesslig schaffe insgehaime
die maischte dert scho, irgend naim
und au e Dail Kemyy und Bangge
het Basel nämmlig uns z'verdangge
au unser Gmiess, das wunderbaare
dien mir scho lang no Basel faare
und wär verlangt als, ganz apaart
«Madame, hänn-se d'Süpercard ?»

Me gseet, es liggt jo uff dr Hand
s'verbindet vyl mee unser Land
mit Basel, dääre scheene Stadt
und dorum bitte mir jetzt grad
im Roothuus, d'Daame und au d'Heere
ass mir zue Basel derfe gheere
denn aifach gsait, nur so am Rand
mir biete mee, als s'Basel-Land



BASLER FASNACHT

6. - 8. Merze 2017



MIR WELLE BLIEWE, WAS MIR SIN !!!

Àtràg vum Elsasser Volk àn d Bàsler Regierung

Hoch beàchtete Regierungsrat vu Bàsel Stàdt,

Sehr geschätzte Grossa Rot,

Liebi Bàslerine, liebi Bàsler . . .

Mir Elsasser, han welle bliewe wer mr sin !

Àber d Frànzose wann nit meh wisse vu uns, so ha mr gnüe vu Pàris wie vu de Schwobe.

Mir schàffe scho làng in Bàsel un bringe s G`mües uf dr Markt. D Bàsler frassa unseri Spàrgla und süffa unser Wi.

Jetz wird s`Zit àss mir zu Bàsel kumme.

Mir hoffe àss ihr uns à-nahme - dàs empfehle mir èich garn - es soll so warda.

Sàli bisàme,
s Elsasser Volk

-----✂----- Doo abschnyde und em Fasnachtscomité schigge -----

JOO DAS FINDI GUET!

	Namme Vorname Bloggschrift	uff d Wàlt koo Daag Moonet Joor	Adrässe Strooss und Nummere	Unterschrift Sàlber unterschryybe
1				
2				
3				
4				
5				
6				
7				

D Ladàärne-Uusstellig isch vom Määndig znacht, 6. Merze, bis em Mittwuch demorge, 8. Merze, uff em Minschterplatz und d Waage- und Reggwisyte-Uusstellig bi dr Kasàärne sin vom Määntig znacht bis am Mittwuch demorge! Deert und an de 3 Verkaufsständ (CINS) in dr Stadt ka men au alli Zeedel und Schnitzelbängg, d Blaggede und dr Rädabängg kaufe.